



Kafara na Ibada Zilidhihirisha Upendo Mtakatifu wa Mungu

Na kila kuhani husimama kila siku akifanya ibada, na kutoa dhabihu zile zile mara nyingi; ambazo haziwezi kabisa kuondoa dhambi. Lakini huyu, alipokwisha kutoa kwa ajili ya dhambi dhabihu moja idumuyo hata milele, aliketiki mkono wa kuume wa Mungu.—**Waebrania 10:11, 12.**

Nyakati za wazee wa imani, matoleo ya dhabihu yaliyounganishwa na ibada ya Mungu yalikuwa ukumbusho wa daima wa kuja kwa Mwokozi na hivyo ndivyo ilivyokuwa kwa taratibu zote za huduma ya patakatifu katika historia ya Israeli. Katika huduma ya hema ya kukutania, na ya Hekalu ambayo baadaye ilichukua mahali pake, watu walifundishwa kila siku, kwa njia ya mifano na vivuli, mambo makuu ya ile kweli inazohusiana na ujio wa Kristo kama Mkombozi, Kuhani na Mfalme; na mara moja kila mwaka akili zao zilipelekwa mbele hadi mwisho kwenye vilele vya matukio ya pambano kuu kati ya Kristo na Shetani, utakaso wa ulimwengu kutoka dhambini na wenye dhambi.

Kafara na sadaka za kaida za Musa daima zilielekeza kwenye ibada iliyo bora, yaani ya kimbingu. Hema la kidunia lilikuwa “ndiyo mfano wa wakati huu uliopo sasa;” ambapo zilitolewa sadaka na kafara zote; sehemu zake mbili takatifu zilikuwa “nakala za mambo yaliyo mbinguni,” kwani Kristo, Kuhani wetu Mkuu, leo ni “mhudumu wa patakatifu, na wa ile hema ya kweli, ambayo Bwana aliweka wala si mwanadamu” (Waebrania 9:9, 23; 8:2).

Tangu siku ile Bwana alipomtamkia yule nyoka pale Edeni, “Nami nitaweka uadui kati yako na huyo mwanamke, na kati ya uzao wako na uzao wake; huo utakuponda kichwa, na wewe utamponda kisigino” (Mwanzo 3:15), Shetani amekuwa akijua kwamba kamwe hataweza kutawala kikamilifu juu ya wakazi wa dunia. Wakati Adamu na wanawe walipoanza kutoa kafara za ibada zilizoagizwa na Mungu kama mfano wa Mkombozi aliyekuwa anakuja, Shetani aliona katika hizo ishara ya ushirika kati ya mbingu na dunia. Katika karne nyingi ambazo zimekuja baadaye, imekuwa ndiyo jitihada yake ya kudumu, kuingilia ushirika huu. Bila kuchoka, amekuwa akitafuta namna ya kumwasilisha Mungu visivyo na kupotosha maana za kaida zilizoelekeza kwa Mwokozi...

Wakati ambapo Mungu amekuwa akitamani kuwafundisha watu kwamba kutokana na upendo Wake Mwenyewe, ndipo inapotokea Karama inayowapatanisha na Yeye Mwenyewe, adui mkuu wa wanadamu amediriki kumwasilisha Mungu kama anayetamani uangamivu wao. Kwa namna hiyo, kafara na kaida za ibada zilizobuniwa na Mbingu ili kudhihirisha upendo wa Mungu zimepotoshwa (Prophets and Kings, 684-686).

Kwa maneno na kwa matendo, Masihi, wakati wa huduma Yake ya duniani, alikuwa amdhihirishie mwanadamu utukufu wa Mungu Baba. Kila tendo la maisha Yake, kila neno alilolinena, kila muujiza uliotendwa, ulikusudiwa kufahamisha jamii ya mwanadamu iliyoanguka, upendo wa Mungu usiopimika

Hivyo, kupitia kwa wazee wa imani na manabii, vilevile kupitia kwa mifano na ishara, Mungu aliuambia ulimwengu kuhusu ujio wa Mkombozi atakayeutoa dhambini (Prophets and Kings, 696, 697).